

NIPPON HARGAI BAKAT MUDA

Kejayaan menganjurkan Anugerah Pereka Muda Nippon Paint untuk kali pertama pada tahun 2008 mendorong Nippon Paint (Malaysia) Sdn Bhd meneruskannya pada tahun lalu. Menariknya, Penolong Pengurus Besar Nippon Paint, Gladys Goh memberitahu lebih 124 pelajar dari 18 Institusi Pengajian Tinggi (IPT) menyertai Anugerah Pereka Muda Nippon Paint 2009 berbanding hanya 10 penyertaan IPT pada tahun sebelumnya.

Anugerah ini dibuka kepada pelajar tahun akhir program diploma dan pelajar tahun ketiga peringkat ijazah dalam bidang reka bentuk dalaman serta seni bina. Mendapat sokongan penuh Persatuan Pereka Dalaman Malaysia (MSID) dan Pertubuhan

Arkitek Malaysia (PAM), penganjuran Anugerah Pereka Muda Nippon Paint bertujuan mencungkil dan mengasah kreativiti generasi muda, khususnya pelajar reka bentuk dalaman dan seni bina. Kemahiran peserta dinilai dari segi kebolehan menggabungkan aliran warna Nippon Paint, inovasi warna, penyelarasan warna, keaslian reka bentuk, nilai estetika, mesra alam dan ikhtisas reka bentuk.

Untuk anugerah tahun lalu yang bertemakan Mempelopori Reka Bentuk dengan Aliran Warna, Tony Tan Yong Maun dari Pratique Asia College dan Ong Tien Yee dari Universiti Kebangsaan Malaysia memenangi anugerah Emas (kategori reka bentuk dalaman dan seni bina). Masing-masing menerima piala khas, biasiswa tunai RM3,000, sijil penghargaan dan komputer Apple. Soo Wei Son dari Institut Seni Lukis Negara dan Ahmaf Faliq Mohd Saparudin dari Politeknik Ungku Omar, Ipoh memenangi anugerah Perak bagi kategori reka bentuk dalaman dan seni bina. Mereka menerima biasiswa tunai RM2,000

dan sijil penghargaan manakala lima pemenang sagu hati menerima biasiswa tunai RM1,000 dan sijil penghargaan. Selain hadiah, semua pemenang juga berpeluang bekerja dengan firma reka bentuk dalaman dan arkitek terkemuka tanah air.

Pratique Asia College dan Universiti Kebangsaan Malaysia pula dipilih sebagai institusi pengajian tinggi terbaik keseluruhan. Pensyarah kedua-dua institusi, Yusof Zainal Abidin dan Ar Nur Akmal Goh Abdullah menerima Anugerah Pensyarah Terbaik dengan membawa pulang piala dan baucar Nippon Paint bernilai RM500. - *Irawati*

